

Morning Dogri (NSD) National News Bulletin 14-09-2024

आकाशवाणी

- जम्मू कश्मीर ते हरियाणा च असैंबली चुनाएं लेई प्रचार लगातार जोर फगड़दा जा करदा ऐ। प्रधानमंत्री ते बीजेपी दे वरिष्ठ नेता नरेन्द्र मोदी होर अज्ज डोडा च चुनावी रैली करगंन।
- केन्द्र सरकारै जमाखोरी ते कीमतें गी स्थिर रखने दे मकसद कन्नै कनक दे भंडारण दी हदद नमें सिरिया तैह कीती ऐ।
- केन्द्री मंत्री अमित शाह होर हिंदी दिवस 2024 दे मौके पर सरकारी भाषा हीरक जयति समारोह दे उद्घाटनी सत्र गी संबोधत करगंन।
- असम च राज्य मंत्रिमंडल नै अनियमित जमा ते गैर कनूनी ट्रेडिंग घोटाले कन्नै जुड़ दे सब्बै मामले सीबीआई गी सोंपने दा फैसला लैता ऐ।
- हॉकी च मर्दे दी एशियाई चैंपियन-हॉकी टूर्नामेंट च भारत दा मकाबला रिवायती हरीफ पाकिस्तान कन्नै होग।

<><><><><><>

Campaign J&K-Hariyana

जम्मू कश्मीर च पैहले गेड़ दे विधानसभा चुनाएं लेई प्रचार जोरें-शोरें जारी ऐ। इस गेड़ तैहत 24 असैंबली हल्के च औंदी 18 सितम्बर गी वोट पोआए जांगन। प्रमुख राजनीतिक पार्टिएं दे बड्डे नेता मतदाताएं गी अपने पक्ख च करने लेई कोई कसर नेई छोड़ा करदे न। प्रधानमंत्री ते बीजेपी दे वरिष्ठ नेता नरेन्द्र मोदी होर अज्ज डोडा जिले च इक चुनावी रैली गी संबोधत करगंन। कांग्रेस ते नैशनल कांफ्रेंस बी अपनी पार्टिएं दे मेदवारें लेई प्रचार करै करदे न। जम्मू कश्मीर बीजेपी दे मुख प्रवक्ता सुनील सेठी होरें कल जम्मू च इक संवाददाता सम्मेलन गी संबोधत कीता। उनें नैशनल कांफ्रेंस ते कांग्रेस पर घाटी च अलगाववाद ते आतंकवाद गी बढ़ावा देने दा आरोप लाया। उनें अग्गे आखेआ जे प्रधानमंत्री नरेन्द्र मोदी होरें जम्मू कश्मीर च रमानदारी ब्हाल कीती ते विकास बाद्धा जकीनी बनाया। उनें आखेआ जे श्री मोदी हुंदे कोल जम्मू कश्मीर गी देसै दा सब्बने शा विकसित खेत्तर बनाने दा नजरिया ते रूपरेखा दौनें हैन।

तोआई साबका मुख्मन्त्री ते डैमोक्रेटिक प्रोग्रेसिव आजाद पार्टी दे अध्यक्ष गुलाम नबी आजाद होरें कल दक्खनी कश्मीर दे डुरु, काजीकुंड ते देवसर च त्रै चुनावी रैलिएं गी संबोधत कीता। प्रदेश च असेंबली दे चुनां कुल त्रै गेडें च करोआए जा करदे न। पैहले गेड तैहत 18 सितम्बर गी, दुए गेड तैहत 25 सितम्बर गी ते त्रीए गेड तैह पैहली अक्तूबर गी मतदान होना ऐ। खीरले गेड दे चुनाएं लेई नामांकन पत्रें दी जांच दे बाद 449 मेदवारें दे नामांकन पत्र दुरुस्त पाए गे न। इस गेड दे चुनां लेई नां वापस लैने दी खीरी तरीक 17 सितम्बर ऐ। तोआई हरियाणा च इक गेड च होने आले विधानसभा चुनाएं लेई बी प्रचार जोर फगड़ा करदा ऐ। प्रधानमंत्री ते बीजेपी दे वरिष्ठ नेता नरेन्द्र मोदी अज्ज राज्य च पार्टी दे अभियान दी शुरूआत करगंन। मोदी होर अज्ज दपैहरी लै कुरुक्षेत्र दे पार्क च चुनावी रैली करगंन। हरियाणा च प्रधानमंत्री हुंदी एह पैहली चुनावी रैली होग। हरियाणा दी 90 सीटें आली विधानसभा लेई 5 अक्तूबर गी मतदान होग। हरियाणा ते जम्मू कश्मीर च वोटें दी गिनतरी 8 अक्तूबर गी करोआई जाग।

<><><><><><><><>

Wheat

केन्द्र नै कनक दे बधा'रदे भाएं ते जमाखोरी गी रोकने लेई बपारिएं, थोक विक्रेताएं, खुदरा विक्रेताएं ते प्रसंस्करण करने आलें लेई भंडारण दी सीमा संशोधत कीती ऐ। केन्द्रीय उपभोक्ता मामले, खाद्य ते सार्वजनिक बंड बिक्री वितरण मंत्रालय नै गलाया ऐ जे बपारिएं, थोक विक्रेताएं लेई संशोधत कनक भंडारण सीमा हुन 2 ज्हार मीट्रिक टन होग। एह सीमा पैहले 5 ज्हार मीट्रिक टन ही। व्यक्तिगत खुदरा विक्रेताएं लेई भंडारण सीमा च कोइ बदलाव नेई कीता गेआ। एह विक्रेता 10 टन तगर कनक दा भंडारण करी सकगंन। मंत्रालय नै इस ब'रे 24 जून गी कनक भंडारण सीमा लागू कीती ही। एह रोक सब्बने राज्यें ते केन्द्र शासत प्रदेशें च अगले ब'रे 31 मार्च तगर लागू रौहग। मंत्रालय नै गलाया ऐ जे कनकन भंडारण कन्ने जुड़ी दी कंपनिएं गी कनक भंडारण सीमा पोर्टल उप्पर पंजीकरण करना होग ते हर शुक्रवार स्टॉक दी स्थिति अपडेट करनी पौग। मंत्रालय नै गलाया ऐ जे इस ब'रे आड़ी मौसम दरान तकरीबन 1 ज्हार 129 लक्ख मीट्रिक टन कनकन दा उत्पादन दर्ज कीता गेआ ते देश च एहदी लोड़चदी मात्रा उपलब्ध ऐ।

<><><><><><><><>

Govt. Oil

सरकारे नै कच्चे तेल उप्पर सीमा शुल्क बधाइयै 20 फीसद ते रीफांड सूरजमुखी तेल उप्पर 32.5 फीसदी करी दित्ता ऐ। वित्त मंत्रालय आस्सेआ जारी अधिसूचना मूजब कच्चे पाम, सोयाबीन ते सूरजमुखी दे बीएं दा तेल उप्पर मूल कस्टम ड्यूटी सिफर शा बधाइयै 20 फीसद करी दित्ता ऐ। रीफांड पाम, सोयाबीन ते सूरजमुखी तेल उप्पर मूल सीमा शुल्क 12.5 फीसद शा बधाइयै 32.5 फीसद करी दित्ता गेआ। कच्चे तेल उप्पर प्रगति शुल्क 5.5 फीसद शा बधाइयै 27.5 फीसद होई जाग ते रीफांड तेलें लेई एह शुल्क 13.15 फीसद शा बधाइयै 35.76 फीसदी करी दित्ता जाग।

<><><><><><><><>

Hindi Diwas

अज्ज पूरे देश च हिंदी दिवस मनाया जा'रदा ऐ। अज्ज दे दिन 1949 च संविधान सभा नै देवनागरी लिपि च लिखी दी हिंदी गी देश दी अधिकारिक भाषा दे रूपे च अपनाया हा। अज्ज हिंदी विश्व च सब्बने शा मती बोली जाने आली भाषा ऐ ते 520 मिलियन शा बी मते लोकें दी पैहली भाषा ऐ। अज्ज इस मौके उप्पर गृहमंत्री अमित शाह होर नमीं दिल्ली च हिंदी भाषा दी हीरक जयंति समारोह गी ते चौथे अखिल भारतीय राजभाषा सम्मेलन गी संबोधत करगंन। इस सममेलन दा आयोजन राजभाषा सरबंधी विभाग आस्सेआ कीता गेदा ऐ। इस मौके उप्पर गृहमंत्री होर हीरक जयंति दे मौके उप्पर राजभाषा भारती मैगजीन दा विशेष संस्करण बी जारी करगंन ते राजभाषा गौरव ते राजभाषा किर्ति सम्मान बी भेंट करगंन।

<><><><><><><><>

Amit Shah

केन्द्रीय गृहमंत्री अमित शाह होरें कल नमीं दिल्ली च 7मीं राष्ट्रीय सुरक्षा रणनीति सम्मेलन दा उद्घाटन कीता। इस दऊं दिनें दे सम्मेलन दरान सरकार राज्यें, केन्द्र शासत प्रदेशें, केन्द्रीय सशस्त्र पुलस बलें ते केन्द्रीय पुलस संगठनें दे वरिष्ठ पुलस अधिकारिएं कन्नै मिलियै उभरदी राष्ट्रीय सुरक्षा चुनौतिएं कन्नै निबडने लेई रोडमैप तैआर करोग। गृहमंत्री होरें डीजीएसपी ते आईजीएसपी सम्मेलन अनुशंसा डैश बोर्ड दी शुरुआत बी कीती। इसी राष्ट्रीय अपराध-रिकार्ड ब्यूरो आस्सेआ विकसित कीता गेआ ऐ।

सम्मेलन च देश दे बक्ख-बक्ख हिस्सें थमां 750 शा मते अधिकारी हिस्सा लै'रदे न। एह्दे शा पैहले गृहमंत्री होरें शहीद स्तम्भ उप्पर पुष्पांजलि अर्पित कीती ते देश लेई सर्वोच्च बलिदान देने आले शहीदें गी भाव भरोची श्रद्धांजलि अर्पित कीती।

<><><><><><><><>

Assam Cabinet

असम च राज्य मंत्रिमंडल नै अनियमित जमा ते गैर कनूनी ट्रेडिंग घोटाले कन्नै जुड़े दे सब्बै मामलें सीबीआई गी सौंपेने दा फैसला लैता ऐ। एह् मामले राज्य दे केई पुलस थानें च दर्ज कीते गे हे। मंत्रिमंडल नै ऐसी गतिविधिएं पर रोक लाने लेई राज्य दे गृह ते वित्त विभाग गी मानक संचालन आली इक प्रक्रिया दा मसौदा तैआर करने दा बी निर्देश दित्ता ऐ। हाल च गै लोकें गैर कनूनी ट्रेडिंग घोटाले कन्नै जुड़े दे मामलें च केई मामले दर्ज करोआए हे ते इस मुद्दे उप्पर पूरे राज्य च बक्ख-बक्ख थाहरें पर बरोध प्रदर्शन कीते हे। घोटाले दे सरबंघै च हुनै तगर 61 लोकें गी गिरफ्तार कीता गेआ ऐ ते 22एं होरने दे खलाफ लुकआउट नोटिस जारी कीते गे न। कन्नै गै घोटाले दी जांच लेई 14 विशेष जांच दल खड़ेरे गे न। पुलस सूत्रें मूजब राज्य च केई ऑनलाइन ट्रेडिंग कंपनियां एसईबीआई जां आरबीआई दे दिशा-निर्देशों दी पालमा कीते बगैर गी चलाइयां जा करदियां न ते एह्दे करी निवेशकें गी नुक्सान होआ ऐ। ऑनलाइन घोखाघड़ी कंपनिएं असम सनें राज्य थमां बाहरै दे निवेशकें गी बी लालच दित्ता ते दऊं म्हीनें अंदर 30 फीसद वापसी दा वादा कीता गेआ हा। साढ़े संवाददाता नै दस्सेआ जे 3 प्रमुख ऑनलाइन निवेश कंपनिएं इक्कले 11 ज्हार करोड़ रुपें शा मते दी घोखाघड़ी कीती ऐ।

<><><><><><><><>

Dr. Jaishankar

विदेशमंत्री डॉ. एस.जयशंकर होरें गलाया ऐ जे समाजिक न्याय, समावेशी विकास ते कनून दे शासन दा सिद्धांत सरकार दी प्रमुख नीति रेई ऐ। जिनेवा च कल भारतीय समुदाय गी संबोधत करदे होई डॉ. जयशंकर होरें गलाया जे सरकार महिलाएं दे नेतृत्व गी बढ़ावा देआ'रदी ऐ, जेह्दे उप्पर पिछले ब'रे भारत दी जी-20 अध्यक्षता दरान बी जोर दित्ता गेआ हा।

चुनां संचालन दे बारे च डॉ. जयशंकर होरें मुख्य दी लोकतांत्रिक प्रक्रिया दी सराहना कीती।
उनें एह बी गलाया जे एनडीए सरकार दा त्रीया कार्यकाल इक महत्वपूर्ण उपलब्धि ऐ जेहड़ी
पिछली प्रगति ते कमिएं दा मूल्यांकन करने ते भविष्य लेई जरूरी सुधार करने दी अनुमति
दिंदा ऐ।

<><><><><><>

Hockey

अज्ज चीन दे हुलुनवीयूर च मर्दे दी हॉकी एशियाई चैंपियन ट्रॉफी दे 5में ते खीरी पूल मैच
च अज्ज भारत ते पाकिस्तान बशकार दपैहरी सवा इक बजे मैच खेड्डेआ जाग। चार बारी दी
विजेता रेई दी भारतीय टीम नै साउथ कोरिया शा सिद्दी चौथी जित्त मगरा सैमीफाइनल
लेई पैहले गै कवालीफाई करी लेआ हा। हरमनप्रीत सिंह हुंदी अगुवाई च भारतीय हॉकी टीम
अजे तगर इस टूर्नामेंट दे सब्बै मैच जित्तदी आई ऐ ते अंक तालिका च 12 अंक लेइयै
सबबने शा उप्पर ऐ। औंदी 16 सितम्बर गी सैमीफाइनल ते 17 सितम्बर गी फाइनल मैच
खेड्डे जांगन।

<><><><><><>